



Siverth K. Heilmann

8. maj 2019  
UPA 2019/45-1

**Ujaqqat pinneraasiassat aalajangersimasut nunatsinni piiarneqarsimasut suliareqqaarlugit sileqqaarlugillu nunatsinniit anninneqartarnissaat piunasaqaatigineqalissagaluarpat pitsaaquti-gisinnaasai pitsanngequtigisinnaasaalu pillugit apeqquteqaat aallaavigalugu oqallisissiaq,**

(Inatsisartuni ilaasortaq Peter Olsen, Inuit Ataqatigiit)

Siunnersuuteqartoq inatsisartuni ilaasortaq Peter Olsen, Inuit Ataqatigiit, qutsavigissavatsigit apeqquteqaat aallaavigalugu oqallinnissamik siunnersuuteqarninnut, imatullu Atassut-miit oqaaseqarfigissavarput.

Siunnersuuteqartoq isumaqatigilluinnarpatsigit, aningaasarsiornikkut ineriartortitsiuarnissaq siunertaralugu, sukut tamatigut anguniartuartariaqaripput. Aap aatsitassanut inatsisiliorpugut, nunami pisuussutit uumaatsut sulluunniit aningaasarsiornikkut suliffissaqartitsiniarnikkullu iluaqutigisinnaaqullugit.

Qangarsuaanilli siulitta ujaqqanik pinneraasiassanik ukkusissanillu il il atorluaasooreerput, namminnerlu kusanartuliornermikkut aningaasarsiornermikkullu tapertarilluarlugit. Ilami ilaasa kusanartuliortarnermikkut inuussutissarsiutitut aallussimallugit. Tupigusuutigisarpara siulitta sumi ujaqqanik allanilluunniit peqarfeqarnera ilisimaarilluinnartarmassuk.

Siunnersuuteqartup - ujaqqanik pinneraasiassanik tunisassiorneq nunatsinni nutaajuneranik oqarnera – eqquvinngilaq, inatsisiliornittali kingornagut, ujaqqanik pinneraasiortarnermi periarfissat naleqqussaasariaqarnerpullu Atassut-miit siunnersuuteqartoq isumaqatigilluinnarparput.

Atassut-miit oqaatigisareerparput, aatsitassarsiornerep pinneraasiortarnerullu iluani anguniartariaqaripput, aallartisarussutut tamakkiinerusumik Nunatsinniit inereerlugit avammut tunisassiorsinnaanerit pimoorunnerullugu anguniartariaqaripput.

1990-kut qiteqqunnerata miss., Telep illuutigisimasaa isatiinnaqqunagu kommuunemi tiguarput, innuttatsinnut takornialerinermut eqqumiitsuliornermullu aallutaqartunut siuariartortitseruskatta. Naalackersuisoqarfinni maluginiarneqarpugut, kinguneraalu eqqumiitsuliornermut ilinniarfittut nunatsinneersunik atorluarneqalerat.

Inatsisartuni partiit ilaasa, nunani allaniik ilaarsiinnarnersuaq isorinillutik uparuartuisarput, taamaakkaluortoq Atassut-ip pingarteqaa, nunatsinni nunalilu allaniit misilittakkat pitsaasut ilinniarfigalugit atorluarneqartarnissaat.



Siunnersuuteqartullumi Tanzaniami inatsisitigut aqqissuussisimaneq innersuussutigimmagu, pitsaaqutit sanngeequtaasinnaasut ilanngullugit naleqqussaasoqarsinnaanera Atassut-miit periarfissat ilaattut ammaffigalugu misissuisoqarsinnaanera isumaqatigalugu oqaatigeriissavarput.

Soorunami aallartisarnermi aporfissaqartoqarsinnaasarpog, naleqqussagassalli eqqumaffigigaanni sullitagut pitsaasumik aqutissiuutissavagut. Siunnersuuteqartup anguniagaa iluatsissappat, misilittagaqareersunik suleqateqarnikkut, selskab-i, suliffeqarfiilluunniit nammineq ingerlasut, Nunatsinni angerlarsimaffeqarnissaat piumasaqaataassasoq, aatsaat iluatsissasoq Atassut-miit qularutiginngilarput.

Nunatsinni ujarassioortitsisarnarput akissarsiartalerlugu pitsaasutut isigaarput. Inoqarporli piffiit ilaanni nassaarsimagaluarlutik nalunaaruteqarnissaminnut tunuarsimaartalersunik. Oqariartaasinngornikuuvoq nalunaarutiginnikkunik, suliffeqarfik ingerlareersoq kisimi aningaasarsiornissaa iluaquserneqartussaana osv osv.

Taamatut Atassut-miit oqallisissiaq oqaaseqarfigaarput, siunnersuuteqartutuulli neriutigaarput, kinguneqarluartumik inatsisartuni alloriarnermik suleriaqqinnissamillu pitsaasumik angusaqarfigiluarneqarumaartoq.

Qujanaq.